

ইসলামের জন্ম ও হজরত উসমানের (রাঃ) যুগ

আকাশ মালিক

(৩)

মাত্র এক বৎসর হলো উসমান (রাঃ) ক্ষমতায় বসেছেন। এরই মধ্যে একদিকে রাষ্ট্রের আভ্যন্তরীণ বিরোধ, অঙ্গরাজ্যের গভর্নরদের ট্যাক্স প্রেরণে অনিয়মিতা হাশিমী ও উমাইয়া গোত্রের মধ্যকার তিক্ততা, এবং সর্বোপরি মদীনায় খাদ্যাভাবে খলিফা ভীষণ চিন্তিত হলেন। সাহায্যের হাত বাড়িয়ে এগিয়ে এলেন সিরিয়ার গভর্নর হজরত মোয়াবিয়া (রাঃ)। পরামর্শ দিলেন আর্মেনিয়া ও তৎপার্শ্ববর্তী এলাকা এশিয়া মাইনর আক্রমণ করতে হবে। উসমান (রাঃ) ক্ষমতায় আরো কিছুদিন থাকার ভরসা পেলে, অন্তত আয়ের একটা পথ খুঁজে পাওয়া গেল। হজরত মোয়াবিয়ার (রাঃ) কথামত উসমান (রাঃ) কুফার সালমান বিন রুবাইয়াকে আট হাজার সৈন্য নিয়ে সিরিয়ার দিকে রওয়ানা হতে নির্দেশ দেন। আর্মেনিয়ার পথে সেনাপতি সালমান (রাঃ) তাঁর দল নিয়ে সিরিয়া বাহিনীর সাথে মিলিত হন। পারস্য ও গ্রীসের মধ্যবর্তী পার্বত্যঞ্চল আর্মেনিয়া চিরদিনই সাম্রাজ্যবাদী পরাশক্তির দৃষ্টিগোচরে ছিল। আর্মেনিয়ার স্বাধীনচেতা অধিবাসীদের কেউই বেশীদিন পরাধীনতার শৃঙ্খলে আবদ্ধ রাখতে পারেনি। এ দেশ পারস্য ও গ্রীস কর্তৃক বহুবার অধিকৃত হয়েছে। হজরত ওমরের (রাঃ) মুসলিম বাহিনী যখন গ্রীকদের হাত থেকে অঞ্চলটি দখল করে, তখনও আর্মেনিয়ানগণ জানতো, এ অধীনতা সাময়িক। উসমানের (রাঃ) সময়ে তারা মদীনায় ট্যাক্স পাঠানো বন্ধ করে দিল। হিজরী পঁচিশ সনের শেষের দিকে সিরিয়া ও ইরাকের সম্মিলিত বিরাট সেনাবাহিনী আর্মেনিয়ার পর্বতমালা অতিক্রম করে তার আভ্যন্তরীণ মালভূমি এলাকায় এসে উপনীত হয়। ওমরের (রাঃ) মৃত্যুর পর মাত্র কিছুটা দিন আর্মেনিয়ানগণ শান্তিতে ছিল। আবার ‘আব্লাহু আকবর’ ধ্বনিতে প্রকম্পিত হয়ে উঠলো পাহাড়ী অঞ্চল। স্বাধীনচেতা আর্মেনিয়ানগণ দেশমাতৃকার জন্যে অকাতরে জীবন দিতে পাহাড় বেয়ে নেমে আসলো। এক হাজার দিনের ক্ষুধার্ত সিংহের মত তাঁদের ওপর ব্যাপিয়ে পড়লো মুসলিম সৈন্যগণ। লোমহর্ষক রক্তক্ষয়ী যুদ্ধে আরবীয় তেজস্বী তলোয়ারের নীচে গলা পেতে দিল সহস্রাধিক তাজা প্রাণ। পাহাড়ের শ্রেতবর্নের ঝর্ণাশি রঙ্গীন হলো আর্মেনিয়ানদের রক্তের স্রোতধারায়। যুদ্ধে পরাজিত হয়ে তারা পূর্বাপেক্ষা দ্বিগুণ হারে কর দেবার শর্তে মুসলমানদের সাথে চুক্তিবদ্ধ হলো। আর্মেনিয়া দখল করে মুসলিম সেনাবাহিনী সূদেশে ফিরে গেলেন না। তাদের সাম্রাজ্য বিস্তারের কাজ পুরোদমে চালিয়ে গেলেন। বিজয়ানন্দে উৎফুল্ল মুসলমানগণ অতি সহজেই আর্মেনিয়ার পশ্চিম দিকে তিফলিশ নগরী দখল করে কৃষ্ণ সাগর তীরে এসে পৌঁছিল। সেখান থেকে দক্ষিণ দিকে ভূমধ্যসাগরের পূর্ব উপকূলে লেভান্ট শহর। এখানে গ্রীকদের সাথে তাদের তুমুল যুদ্ধ হলো। মুসলিম সৈন্যদের গতিরোধ করার মত শক্তি সম্ভবত তখনকার পৃথিবীতে কারো ছিলনা। সুতরাং তারা এখানেও জয়ী হলেন। দেশের পর দেশের, যুগ যুগান্তরের ঐতিহ্যবাহী প্রাচীন কৃষ্টি ও সনাতন সভ্যতা ধ্বংস করে মুসলমানগণ আত্মতৃপ্তি বোধ করলো। কিন্তু কাস্পিয়ান থেকে আরব সাগর পর্যন্ত বিভিন্ন দেশের বিভিন্ন জাতি, আরব জাতির প্রতি রোষান্বিত হয়ে উঠলো। হজরত ওমরের আমলের দখলকৃত কিছু কিছু এলাকায় তাঁর জীবিত থাকা কালেই বিদ্রোহ চলছিল। তন্মধ্যে পারস্যের বিদ্রোহ বিশেষভাবে উল্লেখযোগ্য। ওমরের (রাঃ)

যুগের পলাতক পারস্য সম্রাট ইয়ায্দগার্দ, উসমানের (রাঃ) শাসনকালে মুসলমানদের হাত থেকে সুদেশ পুনরুদ্ধারের প্রস্তুতি নিলেন। অষ্টআশি বৎসর বয়স্কা ইয়ায্দগার্দকে সিংহ-রূপী মুসলমানদের সম্মুখ হতে মুষিক ছানার মত পালিয়ে খোরাসানে আশ্রয় নিতে হলো। খোরাসান ছিল পারস্যের সর্বাপেক্ষা সমৃদ্ধ এলাকা। হজরত উসমান (রাঃ) ঘোষণা দিলেন, যে খোরাসানে আগে প্রবেশ করতে পারবে, সে ই হবে তথাকার শাসনকর্তা। সুতরাং মুসলিম বাহিনী এলাকাটি দখল করে নিতে আর দেরী করলেন না। এ ছিল ছয়শত একান্ন খৃষ্টাব্দের ঘটনা।

রাজ্য বিস্তারের সাথেসাথে কেন্দ্রীয় সরকারের হাতে যুদ্ধলব্ধ বাড়তি সম্পদও আসতে থাকলো। কিন্তু এই লুটের সম্পদ দেশের উন্নয়ন বা সাধারণ মানুষের ভাগ্য পরিবর্তনে ব্যবহার হলোনা। ক্ষমতা ও সম্পদ দুটোই রইলো কোরায়েশদের হাতে। দিনদিন শাসক ও শোষকের মধ্যকার বৈষম্য বাড়তেই থাকলো। বিশাল মুসলিম সাম্রাজ্যের সীমান্ত এলাকায় সৈন্যগণ ধ্বংস ও লুটের কাজে লিপ্ত রইলো আর এদিকে রাজ্যের অভ্যন্তরে শাসকগণ ভোগবিলাসী ফ্যান্টাসী জীবনে অভ্যস্ত হয়ে উঠলো। সিরিয়ার গভর্নর মোয়াবিয়া (রাঃ) যখন হজরত উসমানকে (রাঃ) আর্মেনিয়া আক্রমণ করতে পরামর্শ দেন, প্রায় একই সময়ে মিশরের আবদুল্লাহ্ বিন সা'দ (রাঃ) ত্রীপলি আক্রমণ করতে চেয়েছিলেন। আমার ইবনুল আ'সের (রাঃ) সাথে ক্ষমতার দ্বন্দ্ব ও দেশের আভ্যন্তরীণ গোলযোগে তাঁকে অপেক্ষা করতে হলো অনেকদিন। আবদুল্লাহ্ বিন সা'দ (রাঃ) ৬৫২ খৃষ্টাব্দে পুনরায় ত্রীপলি আক্রমণ করার প্রস্তুতি নেন এবং উসমানকে (রাঃ) সৈন্য পাঠাতে অনুরোধ জানান। উসমান (রাঃ) মদীনা থেকে একদল বিশেষ যোদ্ধা ত্রীপলিভিমেখে পাঠিয়ে দেন। দীর্ঘস্থায়ী এ যুদ্ধ ছিল অত্যন্ত ভয়াবহ ও রক্তক্ষয়ী। এক পর্যায়ে রণভঙ্গ দিয়ে মুসলিম সৈন্যগণ যখন পশ্চাদ গমনের প্রস্তুতি নিচ্ছিলেন ঠিক তখনই মদীনা থেকে আগত তেজস্বী বীর কোরায়েশ যোদ্ধা হজরত জোবায়ের (রাঃ) আবদুল্লাহ্ বিন সা'দকে (রাঃ) একটি মূল্যবান পরামর্শ দিলেন। তিনি বলেন- মুসলিম বাহিনীর মধ্যে ঘোষণা করা হউক, যে ব্যক্তি ত্রীপলির গভর্নর গ্রিগেরিয়াসের মাথা কেটে আনতে পারবে, তাঁকে এক লক্ষ সর্গ-মুদ্রা ও সেই সাথে গ্রিগেরিয়াসের সুন্দরী যুবতী কন্যা দান করা হবে। যেই ঘোষণা সেই কাজ। কিছুদিনের মধ্যেই গ্রিগেরিয়াসের মাথাটা দ্বিখন্ডিত করে সেনা-শিবিরে হাজির করা হলো। সাথে বন্দিণী সেই অনিন্দ্য সুন্দরী তরুণী গ্রিগেরিয়াসের বীর কন্যা, যিনি অস্ত্র হাতে সব সময় পিতার পাশে পাশে থেকে যুদ্ধ করেছিলেন। এক লক্ষ সর্গ-মুদ্রা পুরস্কার বণ্টনে মুসলিম সেনাপতির কোন অসুবিধা হয়নি, সমস্যাটা হলো সেই মেয়েকে নিয়ে। একটি মাত্র মেয়ের দিকে হা- করে তৃষ্ণার্থ চোখে তাঁকিয়ে আছে একপাল কাম ক্ষুধার্থ সৈন্য। মহিলা নিজেই সমস্যার সমাধান করে দিলেন। ঐতিহাসিক মুয়রের মতে, গ্রিগেরিয়াসের বীর কন্যা, পরাধীনতার চেয়ে মৃত্যুকেই সেচ্ছায় বরণ করে নেন। কোন মুসলিম সৈন্যের শয্যা সজ্জিনী হওয়ার আগেই তিনি আত্মহত্যা করেন।

ত্রীপলি যুদ্ধে মুসলিম বাহিনী, যে বিপুল ধন-রত্ন লাভ করেন, তা দেখে খলিফা উসমান (রাঃ) খুশিতে আত্মহারা হয়ে, বিজয়ী বীর-নেতা আবদুল্লাহ্ বিন সা'দকে (রাঃ) বীর-উত্তম উপাধীতে ভূষিত করেন। ইতিপূর্বে কোন যুদ্ধে এত সম্পদ লাভ

করা সম্ভব হয়নি। নিয়মানুযায়ী যুদ্ধলব্ধ সম্পদের এক পঞ্চমাংশ রাজসু খাতে জমা হওয়ার কথা। প্রফুল্লতায় বিভোর উসমান (রাঃ) এই বিপুল সম্পদের প্রায় সবটুকুই আবদুল্লাহ্ বিন সা'দকে ও তাঁর নিজস্ব মন্ত্রী মারওয়ানকে দিয়ে দেন। তবে এ ছাড়া খলিফার কোন উপায়ও ছিলনা। বাইতুলমাল শূন্য রাষ্ট্র-পরিচলনায় যখন উসমান (রাঃ) হিমশিম খাচ্ছিলেন, তখন আর্মেনিয়া ও ত্রীপলি যুদ্ধই তাঁর ক্ষমতায় টিকে থাকার একমাত্র সহায় ছিল। তাই খলিফা নিজেই ত্রীপলির যুদ্ধ-পূর্বে আবদুল্লাহ্ বিন সা'দকে, যুদ্ধে জয়ী হলে এরূপ সম্পদ বন্টনের অঙ্গীকার করেছিলেন। বিষয়টা জনগন প্রসন্ন-চিত্তে মেনে নিতে পারলোনা। উল্লেখ্য, আবদুল্লাহ্ ও মারওয়ান এরা দু-জনই ছিলেন উমাইয়া বংশীয় এবং হজরত উসমানের (রাঃ) আত্মীয়। ত্রীপলি জয় করে মুসলিম সৈন্যদল আলজিরিয়া ও মরক্কো দখল করে নেয়। এবার মরক্কোর উত্তরে সমুদ্রের অপর পাড়ে ফুলে ফুলে ভরা শস্য-শ্যামলা তরু-রাজী আচ্ছাদিত, লোভনীয় স্পেইন ভূমির ওপর তাদের দৃষ্টি পড়লো। সংবাদ পেয়ে খলিফা লোভ সামলাতে পারলেন না। তড়িঘড়ি করে মদীনা থেকে একদল সৈন্য সহ আব্দুল্লাহ্ বিন না'ফে বিন হাসিন ও আব্দুল্লাহ্ বিন না'ফে বিন আবদে কায়েস নামক দুইজন পরাক্রমশালী যোদ্ধাকে স্পেইন অভিমুখে পাঠিয়ে দেন। কোরায়েশ মরু-দস্যুরা তখনো জল-দস্যুতার দক্ষতা অর্জন করতে পারেনি। তাই সমুদ্র-পাড়ে এসে তারা স্পেইন দখলের আশা আপাতত ত্যাগ করতে বাধ্য হলো।

আমরা ইতিপূর্বে মিশরের অসৎ চরিত্রের দুই শাসক আমর ইবনুল আ'স (রাঃ) ও আবদুল্লাহ্ বিন সা'দের (রাঃ) পরিচয় পেয়েছি। এবার ইরাকের প্রাদেশিক রাজধানী ও মুসলিম সাম্রাজ্য বিস্তারে, শক্তির অন্যতম উৎস-স্থল কুফা ও বসোরার দিকে একটু নজর দেয়া যাক।

ইসলামের ইতিহাসের দুই বিশেষ ব্যক্তিত্ব হজরত হাসান বসরী (রাঃ), ও হজরত রাবেয়া বসরীর (রাঃ) জন্মস্থান এই বসোরা। মুক্ত-বুদ্ধি চর্চার মু'তাজিলা মতবাদও এই বসোরা হতে উদ্ভূত। হজরত ওমরের (রাঃ) আমলে কুফার গভর্নর ছিলেন হজরত সা'দ ইবনে আবি ওয়াক্কাস (রাঃ)। খলিফা ওমর (রাঃ) মৃত্যুর পূর্বে একটি মহৎ কাজ করে গেলেন। সরকারী সম্পদের অপচয়কারী, চরম অমিতব্যয়ী মাত্রাতিরিক্ত সুখ-সম্ভোগ বিলাসী সাহাবী হজরত সা'দ ইবনে আবি ওয়াক্কাসকে (রাঃ) কুফার গভর্নরপদ থেকে অপসারিত করে তাঁর স্থলে হজরত মুগীরা ইবনে শো'বাকে (রাঃ) নিযুক্ত করেন। কিন্তু অভাগা সাধারণ কুফাবাসীর দুর্গতি দূর হলোনা। হজরত মুগীরা ইবনে শো'বা (রাঃ) অত্যন্ত রুক্ষ-কঠোর ঔদ্ধত্য ও ক্রুদ্ধ স্তাবের ছিলেন। তাঁর বৈষম্যমূলক অশ্লীল আচরণ, ব্যক্তি কেন্দ্রীক চরিত্র ও জনগনের প্রতি চরম অবজ্ঞার খবর উসমানের (রাঃ) কানে পৌঁছিলে তিনি অতীষ্ট হয়ে মুগীরা ইবনে শো'বাকে (রাঃ) গভর্নর পদ থেকে বরখাস্ত করেন। কিন্তু জনগনকে হতাশ করে হজরত উসমান (রাঃ) আবার সেই সুখ-সম্ভোগ বিলাসী সাহাবী হজরত সা'দ ইবনে আবি ওয়াক্কাসকে (রাঃ) উক্ত পদে নিযুক্ত করেন। হজরত সা'দ (রাঃ) পূর্বের চেয়েও অধিক বিলাসী হয়ে উঠলেন। শুধু তা-ই নয়, এবারে তিনি বাইতুল-মাল থেকে বিপুল পরিমানের সরকারী অর্থ আত্মসাৎ করে বসলেন। তখন বাইতুল-মালের কোষাধক্ষ্য ছিলেন সাহাবী হজরত আব্দুল্লাহ্ ইবনে মসউদ (রাঃ)। উল্লেখ্য বর্তমান কুফার গভর্নর, সা'দ ইবনে আবি ওয়াক্কাস (রাঃ)

ইসলাম-পূর্ব মক্কায় ছিলেন, আকাবা ইবনে আবু মুইতের ছাগল রাখাল। বাইতুল-মালের অর্থ নিয়ে গভর্নর ও কোষাধক্ষ্যের মধ্যে প্রবল মনোমালিন্য ও ঝগড়া হলো। একে অন্যের প্রতি গালাগালি, রূঢ় ব্যবহার এমন পর্যায়ে পৌঁছিল যে শেষ পর্যন্ত গভর্নরের বিরুদ্ধে টাকা আত্মসাৎ করার অভিযোগ, খলিফা উসমানের (রাঃ) দরবারে উপস্থাপিত করা হলো। বিচারে হজরত সা'দ (রাঃ) দোষী সাব্যস্ত হলেন। এবারে কুফার গভর্নর পদে যিনি নিযুক্ত হলেন, তিনি হলেন খলিফা উসমানের (রাঃ) বৈপিত্রীয় ভাই, খ্যাতনামা বীর অলীদ ইবনে ওকবা (রাঃ)। আগুন ধরে গেল কোরায়েশ-হাশিমী গোত্রের গায়ে। মদীনায়, মিশরে, কুফায় সর্বত্র সরকারী গুরুত্বপূর্ণ পদে শুধুই উমাইয়া বংশের লোক। যে হাশিমী বংশে মুহাম্মদের (দঃ) জন্ম, যাঁর জন্ম নাহলে ইসলাম জন্ম নিতেনা, সেই হাশিমী গোত্র এমন আশ্চর্যজনক বরতদাশত করবে কেন? তারা খলিফার বিরুদ্ধে কঠোর ব্যবস্থার প্রস্তুতি নিতে থাকলো।

ভূমধ্য সাগর, পূর্ব এশিয়া ও দক্ষিণ আফ্রিকার উপকূলভাগ বিধৌত করায়, সাগরবক্ষ হতে উল্লিখিত দুই মহাদেশের উপকূলবর্তী জনপদসমূহের ওপর আক্রমণ করার সপ্ন হজরত মুয়াবিয়া (রাঃ) রাত দিন তাড়া করতো। রোম সাম্রাজ্যের পূর্ব মেডিটারেনিয়ান এলাকায় অবস্থিত সাইপ্রাস দ্বীপটি দখলের অভিপ্রায় তাঁর বহুদিনের। হজরত ওমরের (রাঃ) সময়ে মুয়াবিয়া (রাঃ) সাইপ্রাস, পাকিস্তান (তখনকার সময়ের ভারতবর্ষ) ও ভারতের কিছু সমৃদ্ধ অঞ্চল দখল করার পরামর্শ দিয়েছিলেন। হজরত ওমর (রাঃ) তাঁর সেনাপতি আমর ইবনুল আ'সের (রাঃ) পরামর্শে মুয়াবিয়ার (রাঃ) প্রস্তাব প্রত্যাখ্যান করেছিলেন। খলিফা উসমানের (রাঃ) কাছে মুয়াবিয়া (রাঃ) আবার সাইপ্রাস দ্বীপ দখলের প্রস্তাব পাঠালেন। জলযুদ্ধে মুসলিমদের অদক্ষতার কথা স্মরণ করে খলিফা সংকিত হলেন। কিন্তু মুয়াবিয়ার (রাঃ) সাইপ্রাস দখলের প্রয়োজনীয়তার যুক্তি অস্বীকার করতে পারলেন না। যুদ্ধের অনুমতি দিলেন সত্য, তবে একটি ব্যাপারে সতর্ক করে দিলেন। উসমান (রাঃ) তাঁর খেলাফতের অভিজ্ঞতা থেকে বুঝতে পেরেছেন, বিগত অনেক যুদ্ধে বিভিন্ন এলাকার অমুসলিম, পাড়াগাঁয়ের অশিক্ষিত কিছুকিছু লোক শুধুমাত্র যুদ্ধলব্ধ সম্পদের লোভে ইসলাম গ্রহণ করে। তাঁর বিশ্বাস এরা সঙ্গবদ্ধ হয়ে একদিন ইসলামের খলিফার বিরুদ্ধাচরণ করবে। খলিফার এই বিশ্বাস মোটেই অমূলক ছিল না। ইসলামের ইতিহাস, সাধারণ মানুষের মনে এই বিশ্বাসেরই জন্ম দিয়েছিল যে, যুদ্ধই জীবিকা নির্বাহের একমাত্র উপায়।

অনুমতি পেয়ে হজরত মুয়াবিয়া (রাঃ) সারা দেশে বিজ্ঞপ্তি দিয়ে সৈনিক আহ্বান করলেন। জলযুদ্ধের ট্রেইনিং শুরু হলো। রাজধানীতে মানুষের দলেদলে সৈনিকের খাতায় নাম লিখানোর তোড়জোড় পড়ে গেল। কিছুদিনের মধ্যেই বিরাট শক্তিশালী নৌ-বহর গড়ে উঠলো। আব্দুল্লাহ্ বিন- কায়েস আল্ হারেসীর নেতৃত্বে, আলাহর নাম নিয়ে, হিজরী আটাইশ সনে মুসলিম বাহিনী সাইপ্রাস উপকূলে এসে পৌঁছে। গ্রীক নৌ-বাহিনীর সাথে পরদিন শুরু হলো ভয়ানক যুদ্ধ। প্রথম দিনের যুদ্ধেই মুসলিম সেনাপতি আব্দুল্লাহ্ বিন- কায়েস (রাঃ) তীরবিদ্ধ হয়ে গুরুতর আহত হলেন। খবর পেয়ে মদীনায় খলিফা চিন্তিত হলেন। তাড়াতাড়ি মিশরের গভর্নর আবদুল্লাহ্ বিন সা'দকে (রাঃ) সাইপ্রাস অভিমুখে সৈন্য পাঠাতে নির্দেশ দেন। মিশর থেকে আবদুল্লাহ্ বিন সা'দ সৈন্য নিয়ে আসার আগ পর্যন্ত মুসলিম

বাহিনী আত্মরক্ষামূলক যুদ্ধ চালিয়ে গেল। অল্পদিন পরে মিশর ও সিরিয়ার সম্মিলিত নৌ-বাহিনীর প্রচণ্ড আক্রমণে গ্রীক বাহিনী পরাজয় বরণ করে। বুদ্ধিমান, বিচক্ষণ মুয়াবিয়া (রাঃ) সাইপ্রাস অধিবাসীগণের ওপর জিজিয়া কর ধার্য না করে রাষ্ট্রের ওপর বার্ষিক ৭০ হাজার দিনার (সুর্ণ মুদ্রা) ট্যাক্স আরোপ করেন। রাষ্ট্রীয় ক্ষমতা তাদের হাতে ছেড়ে দেন। মুয়াবিয়ার পরামর্শে আবদুল্লাহ্ বিন সা'দ নৌ-বহর বোঝাই করে যুদ্ধলব্ধ মাল নিয়ে দেশে প্রত্যাবর্তন করেন। সেনাপতি আবদুল্লাহ্ বিন- কায়েস (রাঃ) অন্য একটি যুদ্ধে মারা যান। জীবিত কালে তিনি কমপক্ষে ৫০টি যুদ্ধে অংশ গ্রহন করেছিলেন।

আবদুল্লাহ্ বিন সা'দ যখন সাইপ্রাস উপকূলে জল-যুদ্ধে বাস্ত, হজরত মুয়াবিয়া (রাঃ) তখন স্থল-যুদ্ধে কনষ্টানটাইন দখল করতে বেবিয়ে পড়েন। কনষ্টানটাইন দখল করতে মুয়াবিয়া (রাঃ) দুইবার চেষ্টা করে ও ব্যর্থ হন। কিন্তু ঐ বৎসরই তিনি আর্জরুম প্রদেশের অন্তর্গত হাস আল-মুরাত নামক এলাকাটি দখল করতে সক্ষম হন।

কুফার নব-নিযুক্ত শাসন কর্তা অলিদ ছিলেন নবীজী মোহাম্মদের (দঃ) প্রাণের শত্রু ওকবার পুত্র। নবীজীর সাথে ওকবার একটি ঘটনা কুফাবাসীর জানা ছিল। এক যুদ্ধে মুসলিম সৈন্যদের হাতে ওকবা বন্দী হয়ে ঘৃণা ও তাচ্ছিল্য ভরা সুরে নবীজীকে প্রশ্ন করেছিলেন যে, তিনি (ওকবা) মারা গেলে তাঁর সন্তানগণ কি খাবে? উত্তরে নবীজী বলেছিলেন- *দোজখের আগুন খাবে।* সেই ওকবার ছেলে অলিদকে, অসৎ চরিত্রের লোক হিসেবে মানুষ আগে থেকেই জানতো। ক্রোধে, ঘৃণায় কুফাবাসী বারবার খলিফার কাছে অভিযোগ করেও কোন ফল পেলোনা। অলিদের কঠোর দমন নীতির সামনে সাধারণ মানুষ মাথানত করতে বাধ্য হলো। অন্যায, অত্যাচার আর সেচ্ছাচারিতার চূড়ান্ত সীমায় এসে অলিদ (রাঃ) একদিন জনতার ফাঁদে ধরা পড়ে যান। মদ্যপানে অভ্যস্ত, হজরত অলিদ (রাঃ) নেশা-গ্রস্থ হয়ে একদিন এমন ভাবে ঘুমিয়েছিলেন যে, কিছু লোক তাঁর হাতের আঙ্গুল থেকে রাষ্ট্রীয় সীলযুক্ত একটি আংটি খুলে, অসংযত চরিত্রের প্রমান স্বরূপ, মদীনায় খলিফার কাছে নিয়ে যায়। তা ছাড়া তিনি একদিন নেশায় বিভোর হয়ে মসজিদে ইমামতির সময়ে ফজরের নামাজ, ফরজ দুই রাকাতের যায়গায় চার রাকাত পড়ায়েছেন বলেও তারা খলিফার কাছে অভিযোগ করে। এ নিয়ে সারা দেশে বিক্ষোভ ঠেকাতে খলিফা বাধ্য হয়ে হজরত অলিদকে পদচ্যুত করেন। এর পর থেকে অলিদ (রাঃ) আর কোনদিন হজরত উসমানকে (রাঃ) সুনজরে দেখেননি। এবার খলিফা কুফার মসনদে বসালেন বসোরার সেনাপতি, কোরায়েশ বংশের তরুণ বীর যোদ্ধা সাইদ বিন আল্ আ'সকে। এই ব্যক্তির ভেতর কোরায়েশ সুলভ অমানবিক, দুশ্চরিত্রের অভাব মোটেই ছিলনা। কোরায়েশদের ঔদ্ধত্য, অহমিকা কুফাবাসীর জানা ছিল। আগের সকল শাসকের চেয়ে নতুন গভর্নর ভয়ানক রূপে প্রকাশ হলেন। তিনি স্থানীয় অমুসলিমতো দূরের কথা, অ-কোরায়েশ মুসলিমদেরকেও হীন মর্যাদার, পশু পকৃতির বলে খলিফাকে পত্র দ্বারা অবহিত করলেন এবং বল্লেন, এদেরকে তিনি লৌহ-দন্ড দিয়ে শাস্তি করবেন। তিনি প্রকাশ্য ঘোষণা দিলেন, একমাত্র কোরায়েশ বংশই সম্ভ্রান্ত, শালীন ও উচ্চমর্যাদার দাবী করতে পারে। একটি বৈঠকে সাইদ যখন বল্লেন- সোয়াদ উপত্যকাটি একচেটিয়া কোরায়েশ বংশের লোকদের জন্য রক্ষিত, উপস্থিত জনগণ

সমসূত্রে প্রতিবাদ করে উঠলো। তারা বললো- এই বিশাল মুসলিম সাম্রাজ্য বিস্তারে কুফা ও বসোরাবাসীর অবদান ভুলে গেলে কোরায়েশদের ভালো হবেনা। সারা দেশ জুড়ে গণ-বিক্ষোভ ছড়িয়ে পড়লো। এই বিক্ষোভের পরিপ্রেক্ষিতে হজরত উসমান (রাঃ) কি পদক্ষেপ গ্রহন করেছিলেন তা আমরা যথাস্থানে আলোচনা করবো। ইত্যবসরে বসোরার একটু খোঁজ নেয়া যাক।

রাজনৈতিক গুরুত্বের দিক দিয়ে কুফার পরেই বসোরার স্থান। কুফা ইরাকের উত্তরাঞ্চলের ও বসোরা দক্ষিণাঞ্চলের রাজধানী ছিল। বসোরার শাসনকর্তা এখান থেকে দক্ষিণ পারস্য, বেলুচিস্থান ও মধ্য এশিয়া পর্যন্ত শাসন চালাতেন। কুয়েতের দক্ষিণাঞ্চলও বসোরার শাসনাধীন ছিল। হিজরী ২৪ সনে হজরত ওমর (রাঃ) সাহাবী হজরত আবু মুসা-আশআরীকে (রাঃ) বসোরার গভর্নর নিযুক্ত করেন। একনাগাড়ে বহুদিন অন্যায়াভাবে ক্ষমতার অপব্যবহার করে আবু মুসা-আশআরী (রাঃ) হয়ে উঠেন এক ভয়ানক আত্মশত্রু সৈর-শাসক। একটি এলাকা দখলের প্রস্তুতিকল্পে আবু মুসা-আশআরী (রাঃ) মসজিদে জিহাদের ফজিলত বর্ণনাকালে বলেছিলেন যে, পায়ে হেঁটে জিহাদের ময়দানে গেলে প্রচুর সোয়াব অর্জন করা যায়। লোকে বললো- তাঁর কথায় মিথ্যাচার আর হঠকারিতা আছে। পরদিন ভোর বেলা অবাক বিষ্ময়ে সাধারণ জেহাদীগণ প্রত্যক্ষ করলো, গভর্নর আবু মুসা-আশআরী (রাঃ) রাজকীয় পোষাকে তাজী ঘোড়ায় চড়ে প্রাসাদ থেকে বেরিয়ে আসছেন। চল্লিশটি গাধা তাঁর যুদ্ধ-সরঞ্জাম বহন করছে। কিছু লোক তাঁর পথ রুখে দাঁড়ালো। আবু মুসা আশআরী (রাঃ) ঐ লোকদিগকে নীচ, হীনমনা, বদজাত বলে ধমকালেন এবং তাদেরকে কঠোর শাস্তির হুমকি দিলেন। পূর্বে তাঁর অসীম ক্ষমতার অহমিকা ও সেচ্ছাচারিতায় অতিষ্ঠ হয়ে জনগন বিদ্রোহ করে বারবার বার্থ হয়েছে। আবু মুসা (রাঃ) তাঁর আত্মীয়জনদেরকে অত্যাধিক সুযোগ সুবিধা দিয়ে রাষ্ট্রকে, সুবিধা প্রাপ্ত ও সুবিধা বঞ্চিত এই দুই শ্রেণীতে বিভক্ত করে ফেলেন। সুবিধা-বঞ্চিতদল সংগঠিত হতে থাকে এবং এক পর্যায়ে মদীনা পর্যন্ত তাদের বিদ্রোহ ছড়িয়ে পড়ে। একটি নিশ্চিত গৃহ-যুদ্ধের লক্ষণ টের পেয়ে খলিফা উসমান (রাঃ) হিজরী ২৯ সনে, আবু মুসা-আশআরীকে (রাঃ) গভর্নরপদ থেকে বরখাস্ত করেন। গৃহ-যুদ্ধ ঠেকানো গেল কিন্তু বসোরা বাসীর দুঃখ দূর হলোনা। এবারে বসোরার ক্ষমতায় বসলেন, খলিফা উসমানের (রাঃ) মামাতো ভাই আব্দুল্লাহ ইবনে আমীর। এই লোকটি খালিদ বিন ওলিদ ও আমর ইবনুল আ'সের চেয়ে ও ভয়ংকর দুর্ভয় ছিলেন। ক্ষমতায় বসেই তিনি রাষ্ট্রীয় ক্ষমতায় অ-কোরায়েশদের অধিকার নিষিদ্ধ করে দেন। আব্দুল্লাহ ইবনে আমীর ভীষণ প্রকৃতির লোক ছিলেন। তাঁর অমানবিক কঠোর শাসন-নীতি মানুষের মনে ত্রাসের সৃষ্টি করে। ধীরে ধীরে সমগ্র মুসলিম জগত দুই ভাগে বিভক্ত হয়ে গেল। কোরায়েশ বনাম অ-কোরায়েশ। একদিকে যেমন খলিফা উসমানের (রাঃ) রাজ্য বিস্তার, বিভিন্ন দেশ, এলাকা দখল ও দখলকৃত এলাকায় বিদ্রোহ দমনকার্য চলতে থাকলো, অপরদিকে দেশের অভ্যন্তরে, হজরত উসমানের ক্ষমতাসীন উমাইয়াদের বিরুদ্ধে মোহাম্মদের (দঃ) হাশিমী বংশ, আরবদের বিরুদ্ধে অনারব, কোরায়েশদের বিরুদ্ধে অ-কোরায়েশ, শোসকের বিরুদ্ধে শোসিতের বেঁচে থাকার সংগ্রাম অব্যাহত রইলো।

চলবে-